

四庫全書

集部

欽定四庫全書

集部

吳郡文粹續集卷三十三

詳校官庶吉士_臣朱理

侍讀_臣孫球覆勘

總校官進士_臣繆琪

校對官主簿_臣汪日贊

謄錄監生_臣李大綬

欽定四庫全書

吳都文粹續集卷三十三

明 錢穀 撰

寺院

天平山白雲禪寺重興碑

姚廣孝

天下佳山水固有矣必遇乎名公偉人以發其跡然後境益勝而名乃著也興壞理亂措諸事業必賴乎才能智謀有足為者然後見其成效也山水雖佳微名公偉人以發其跡則境之蕪沒而名之昧昧者益多矣興壞

理亂微才能智謀有足為者必不能見其效也非惟不能見其效而反致於顛覆隕墜者往往亦多矣故山水事業顯隱成壞在乎其人若汲汲欲得其人而人卒不可必得或數千百年之間不求而自得者何也蓋物之顯隱成壞關乎氣運屬乎時緣而致然爾豈在有意而為之者哉天平山白雲禪寺創於唐寶曆間至宋天聖寶諦大師來是山見寺之基構狹陋不足容廣衆始開拓其場地以成大剎慶厯中文正范公愛其泉石清

麗林園茂密故奏請為香火院忠宣公繼父之志遴主
法席者謀諸蘇長公子瞻遂延致遠錄公始革律為禪
矣寺之住持非有德有言者不足以當之故歷代皆名
沙門也元末丙午天兵臨吳城寺燬於燹聲無所有但
荒烟茂草鞠為狐虺之圃矣洪武七年復菴主禪師來
領是寺復菴乃先住持士瞻公之大弟子也其戒行兼
優操略並善故寺衆與文正公子孫謀曰起寺之廢者
非復菴不可也於是相率耆彥禮請主之雖寺恒產而

賦役甚劇復菴夙夜酬應弗有勞苦况東序比丘智在
左右羽翼支費搏羨以興厥功故大雄之殿方丈之室
說法之堂栖禪之所山門廊廡庠庑庖湍鐘魚鼓板之
設熏炬爪華之供廿年之間無不備具而未嘗持一疏
干一人忼然成此大業若地設天造可謂能事畢矣噫
太平泉石之清麗甲於中吳丈正公為之主維故境益
奇而名益振寺極其廢得復菴為之中興而有以見其
成效也以斯論之山水雖佳不過乎名公偉人則境湮

而名替興壞理亂不賴乎才能智謀有足為者必不能見其成效也審矣今復菴之中興是寺雖經營措集彌歲不寧略不見其艱難困苦之狀可謂才能智謀有足為者矣今年秋以書來北平求予述之以示其後予吳人也天平乃熟遊之地復菴與予友頗切知寺之興廢惟詳故弗讓而為之書乃復系之以詩曰

天平之高冠於吳山林木茂蔭雲泉潺湲巖巖龍門是為玄關雄號既伏猿狖寧攀勝妙境界佛刹是宜迺創

于唐寶諦載治堂構靚深緇徒皈依偉乎范公朝請主
維敬延紫石始習禪儀境益其勝名益其彰靡有碩德
莫據猊牀歷代繼席皆非尋常人境俱絕可抗大方越
歲丙午天兵臨吳歛罹鬱攸百燬一無錦繡園林化為
邱墟有來遊者無不長吁復菴振起効其才能不甘年
間衆廢具興比邱智在乃同厥心左右贊襄其力孔任
棟宇蔚如丹碧爛然有物畢備一如其先濟濟真侶安
居彌堅寅夕禪修天子萬年

遊天平白雲禪寺

錢藻

小港通行三十里亂花深淺到山西
誰知絕徑無閒地還有幽人向此棲
簷上泉聲龍虎動塔前林影日星低
高僧不放白雲出欲構巖巒與閣齊

再遊天平有懷舊事呈壽老

范成大

訪舊光陰二十年殘僧相對兩依然
木蘭已老無花發石竹依前有麝眠
萬戶直須龜手藥一龕何用買山錢
從今半坐須分我共說昏昏一覺禪

題天平寺

袁桷

青鞋高挂天平壁，遙指雲門三兩峰。
禪榻已容黃葉覆，詩瓢從把綠苔封。
曉風殘月千村鴈，細雨疎烟隔水春。
我向京師宜老矣，吳山清淺越山濃。

同前

倪瓚

龍門秋月影茶室，白雲泉不與世人賞。
瑤草自年年復有，天池水松風舞淪連。
何當躡飛鳬，一采池中蓮。

送圭復菴還天平寺

釋來復

白雲泉上遠公菴我首棲禪借一龕夜壑松濤寒作雨
春林花霧溼浮嵐龍門客賦詩成軸虎阜僧來頌有函
楚些難回南麓定蒲團詩與話同參

江左多年不得書范公祠下往來踈義田無恙微科後
梵刹重新刳燒餘火擁芋爐寒榻靜水添蓮漏夜堂虛
架漿曾習西方觀幾聽晨齋報木魚

天平謁范祠

陳基

古木蒼藤開寺門清泉白石駐華軒丹青不改天平廟

闕闕猶知慶曆尊
四面峰巒旗鼓列
一村桑柘子孫蕃
皇皇冠冕餘生氣
再拜令人媿後昆

登天平山訪圭禪師

姚廣孝

遠歸吳下寺
重上白雲泉
勝地游非偶
名山到是緣
僧行晴雪裏
虎嘯夕陽邊
開士情何厚
茶餘話昔年

夏日遊白雲寺二十韻

地靈山勝絕
觸熱試幽探
斗近龍門險
巖深虎穴嵌
畦懸藤絡石
波靜竹林潭
谷響風前澗
巒光雨後嵐
松靄

華蓋麗泉出白雲甘夏實知青李冬枯識老桺蟬窺岷
匿鷗搏草棲鷗操徑蹂行疾遮途蟻戰酣岫伸眉細
細苔布髮毵毵沼旭疑盤沐湖天訝鏡含歸樵仍佩斧
游子每停驂一澗分高下雙峰自北南煌煌忠烈廟寂
寂遠公菴桂聚香為室蘿縈翠作龕函文殊貝葉遮萼
異優曇剎影晴標遠鐘聲夕度鰲東西廊兩兩前後衆
三三法自齋餘說禪從浴罷參厯奇寧有倦玩勝已成
耽便欲攜瓶錫相依詎不堪

春日過天平輿上口占

樂遊那厭去程賒穩穩籃輿勝小車
烟柳青邊疑野店露桃紅處是山家
澗分燕尾泉來細嶺轉羊腸路入斜
趣既有餘吟亦就此行應不負韶華

次韻答天平復菴師二首

清晨荷笠出江城乘興來參肯待晴
雲起東山藏剎影水流西澗帶鐘聲
茶燒活火嘗新味詩寄長牋寫舊情
便欲泉頭分半榻相依談笑盡餘生

獨客燕山近薊邱
隨身瓶錫數年留
昨朝過魯非無樂
今日還吳却有愁
屋老郊園蛙產竈
窓寒風雨鼠侵裘
故交猶得師存愛
握手歡呼慰白頭

寄天平復菴

不到天平二十秋
老禪宜是雪盈頭
白雲泉上青松下
惆悵年來幾夢遊

題天平壽老方丈

范成大

二十三年再入山
此山於我有前緣
時人不用憐衰病

天與丹房一線泉

送壽老往雲間行化

天平船子過華亭
含衛城中次第行
留取鉢盂歸院洗
東巖新出一泉清

天平寺

蔡羽

石壁如仙掌
行人輕路長
千重翠巒秀
百畝綠陰涼
紫磴連瑤闕
青岑控石梁
白雲泉味冽
得共遠公嘗

自吳門至天平白雲泉晚興

皇甫孝

鐘聲緬迴策秀色餘西岑微徑不知處白雲長自深松
窗散花雨溪牖搖峰陰獨夜泉亭月寥寥期此心

白雲泉寺在太平山一名天平寺唐寶曆二年僧永
安建名白雲菴以山有白雲泉也宋慶厯間范仲淹
以先墓所在奏為功德寺因賜今額元末燬國朝洪
武初僧復菴重建

秋日重遊穹窿山海雲精舍

姚廣孝

昔年曾駐錫此地喜重遊樹影兼雲合蟬聲帶雨收澗

循松下砌峰繞竹邊樓到後嗟難偶吟踪去復留

其二

歷歷青山裏層岷倚曲房竹雲時駐影桂露夕團香未
暮先垂暝方秋已薦涼莫言今索寞自可勝他鄉

其三

巖棲還傍鴈複嶺自層層叩戶頻來徧尋蹊每到僧苔
深終隱梵樹老尚懸藤但可行吟處題詩記我曾

其四

林屋藏深密盤盤石徑斜過樵驚睡犬回牧亂鳴鴉垣
碧蘿藏葉籬紅槿綴花到時須放浪莫問是他家

其五

迢遞青村外崎嶇紫邏間過林纔見日到渡不逢山一
室依巖險雙扉傍竹間曾看雲際鶴向暮獨飛還

其六

勝處初遊日長疑別有天樓開扉納月庖接筧通泉鐘
散羣峰外禽回雙樹邊也知宜眺望不獨可安禪

其七

地遠塵難到人家半隔溪
放禪還候磬起曉却憑鷄
雲度隨山窈窕行赴澗低
披叢尋薜壁更為刻新題

其八

積雨秋初霽林園薜護扉
葵妍花愈盛橘病實還稀
徑露香沾屐嵐烟翠上衣
山翁能引客徐步向斜暉

其九

一徑通林遠時間長者來
水光搖定室松影落香臺
援

為防彪設軒因放鶴開若將吟適興滿眼是詩材

其十

山人無所事沿堵只栽松黃葉深深屋青烟遠遠峰苔
蹊屯鳥跡石厂宿雲蹤留客同迂步乘昏欲聽鐘

訪道衍上人時寓海雲

張羽

尋僧自補屐古寺夏雲中聽鳥明聞性看花悟色空風
傳烟磬遠竹引野泉通便欲捐塵累香燈事遠公

宿海雲上人房

韓奕

古剎松間寺間游夢裏身雨聲留杖履香氣煖牀茵僧
話禪心靜交情道誼真老來偏好佛從此往來頻

留海雲菴

年老人間事不求每從方外樂清游雲深古寺疑無暑
雨足山田望有秋嘉木千章當徑合懸泉十丈下溪流
也知賓主相忘久竹杖籃輿任去留

頻年度夏此僧房眠食清便禮數忘盤出楊梅堪薦酒
瓶添薝蔔罷薰香滿堦松影齋鐘午繞榻泉聲客枕涼

況有諸生皆向學時時列坐論文章

寄海雲僧

香暗燈明佛殿深
梵筵僧散夜沉沉
庭梅影轉經窗月
誰伴高人擁被吟

庭雪初消蕙艸香
日晴便覺有春光
老來事事心皆懶
獨有登山興未忘

海雲院觀連理山茶

吳寬

奉慈山茶好標格
花開如杯呈玉色
海雲山茶更奇絕

奇處不論紅與白兩株並植東軒前翠葉如屏遮几席
枝柯一一相交加為是同根忍分拆初疑一人獨叉手
忽作兩人仍促膝少焉掉臂纔跬步又獨控拳當肘腋
碧玉磨沙成玦環青絲絢索分徽纒我來庭除稍摩挲
引此青蛇受毒螫試量旁幹得三圍每掃落花凡一石
風霜飽歷三百年未識何人手中植尋常繞樹多詩客
階下莓苔留古迹河中曾辱昌黎丈西蜀休誇孔明柏
世間大樹儘有之似此山茶何處得

前題次匏翁韻

伊乘

匏翁詩存古風格譬則毛施真國色滌除烟粉市門粧
綽約肌膚天下白海雲禪院賦山茶文采風流傾合席
兩間淑氣逢交暢殊本連柯豈輕拆邇來誰遣異榮悴
坐減賞心空抱膝常侍貂璫耀左耳詩老偏枯傷右腋
揚眉意氣影華纓垂首幽憂係縲繆修容想為過客妍
解腕疑逢毒蛇螫分留物色供品題且免隨網入花石
百年存歿感交情滿紙縱橫遺墨迹靈山黃面憶曾拈

淨土緇衣舊煩植地脈潛通上世塋古形作配前朝柏
從知物理有興衰休徇人情量失得

海雲寺

王寵

名山時訪舊絕壑愛觀泉徑隱千重竹林窺一帶天疎
花遲候發幽鳥好音傳悟得無生樂行藏不離禪

暮春過海雲寺寫竹石古槎

倪瓚

春盡湖濱偶獨來高僧煮茗得談諧鳥啼花落忽如夢
水影苔文渾上堦空咏遠遊悲世俗聊將曠望遣情懷

竹林生笋還相別人事睽離亦易垂

海雲寺在吳縣穹窿山北麓宋熙寧間僧性海建姚
廣孝為僧時常住此內有連理山茶

堯峰山佛殿記

王鏊

吳橫山之西南有峰名堯莫知其所始或曰堯時民於

此避水也

蘇子美詩西南登堯峰俗云堯所基洪水不能沒上有萬衆栖

唐末慧禪師

者始建精舍曰免水院宋改曰壽聖寺有寶雲禪師繼
居之會學去來恒數百人元涉國初久弗不治弘治初

有雲谷禪師諱蔭始謀居之與其徒文通披叢剔薈支
傾葺頽歲餘人漸知之雲谷軌行峻特通亦戒律清修
遠近參謁者日衆始相與立山門繚以石垣觀音龍王
之殿寶雲碧玉之沼東齋西隱以次修復而大雄殿費
鉅未遽議也久之雲谷示寂通矢志乞諸檀越一
時鉅公名士亦多禮焉於是富者施財貧者施力豫章
甌甃無脛而自至不召而雲集大雄之殿倏還舊觀矣
初予自內閣告歸間一造焉峭壁梯空側足而上及至

其顛曠然平夷林壑巖洞之縈紆池沼泉石之秀麗却
而望之則太湖萬頃浩蕩在前而吳興雲間諸峯亦隱
隱可見信地之高且勝者也則洪荒之世民聚居以免
懷襄之患亦或然歟地雖勝而其蕪也久得人焉居之
則蕪者治頽者起事之興廢其不在人乎今天下之事
廢而不舉者亦多矣彼獨何修有若易易然者乎予誠
嘉焉為記其事嵌諸壁

堯峰寺

高啟

堯帝何年到名猶在此峰巖留千尺井寺發兩時鐘僧
出因尋菌人來為看松白雲深洞裏聞有聽經龍

同前

周南老

橫山聳別峰仰陟高岩堯佛宮古唐宇照耀山之椒老
松偃翠蓋澗壑迴鮮飈沼澄碧玉瑩龍歸白雲飄開軒
面平湖清輝日可招尋僧特相問峯名何以堯

題堯峰寺蔭公山房

伊乘

我生素有烟霞癖筍輿清暇窮幽僻隔嶺猶聞鐘磬音

荒苔似斷漁樵跡
山居老宿霜滿髯
蒲團遮眼看楞嚴
神龍聽講出深洞
野鹿啣花常近檐
人烟曠絕非凡境
石湖倒落晴天影
千年文字留斷碑
百尺轆轤牽古井
小童座上送茶甌
軟語接耳爐熏浮
羹藜飯糗度晨夕
草生木落為春秋
幻相偶然分主客
姓名免使磨厓刻
來朝回首白雲深
半空飛鳥青山色

宿堯峰寺

王鏊

堯峰自在諸天上
半醉來登不用扶
思入湖天同浩蕩

望窮雲樹轉模糊五更客夢侵雲冷一片禪心對月孤
自是世緣猶未了幾時同此結跏趺

堯峰寺在橫山即唐之免水院

暑中遷寓甫里精舍

柳貫

城隅亦有果園坊容得幽人借草堂何必漁樵之笠澤
故多水石近滄浪過橋稍接魚蝦市泛艇遙連雁鷺鄉
秋雨幾時能破塊夜燈休負讀書牀

夜投白蓮寺

徐賁

飲別東家叟行投西寺僧無風收閣慢有月罷廊燈竹
夜聲偏集池寒色似凝無端值詩景清興覺逾增

白蓮講寺在長洲縣二十都甫里即陸龜蒙別業祠
堂在焉宋熙寧六年僧惟吉建

覺海菴

徐有貞

游興殊未盡強君還共行登山身特健看竹眼偏明醉
覺人寰小閒知世事輕芳時莫辜負難得是昇平

宿覺海菴

沈周

幽居嫌未遽窈窕藉雲重地溼千莖菌門陰十箇松古
厨寒食飯虛谷夜分鐘起坐月當午推窓見碧峰

早起

茆峰舊到今又宿一夜頓忘行力勞隔橋虎跡林雨過
聒枕鳥聲山日高自知狂客興不淺豈是老禪吾愛逃
悠悠竹閣盥漱際恰有微風吹鬢毛

下蓮峰尋山登覺海

皇甫孝

蓮峰攀陟罷獨下虎溪湄鐘動閒雲外春濃落日時去

携泉竹淨行厯石苔滋更踐無人境烟霞與興隨

覺海菴在賀九嶺之東元至元間僧志仁建

過磧砂寺

吳寬

日斜湖上過野寺倦登臨老樹風聲合頽垣雨跡深蛟
龍潛近浦鳥雀避叢林不見筠溪叟詩禪久絕音

同前

沈周

雙幢落日倚漁汀北下孤舟此暫停野客偶驚雲外犬
老僧隨拚石邊經沙洲古樹藤蘿紫大殿遺基薺麥青

今夜試留湖上枕疎鐘高浪不堪聽

磧砂禪寺舊名延聖禪院在長洲縣二十六都陳湖
北宋乾道間僧道原建元僧圓至記寺有大藏經坊
僧云鳥雀不入坊中元時詩僧天隱自江右來居此
號筠溪有詩集

接待寺八詠

姚廣孝

玄音堂

道本靜中心秋潭皎月沉無言得真趣何用覓玄音

含暉樓

樓高逼層雲遙瞰東湖境香斷客不來斜陽半簾影

挹清閣

虛閣映漣漪禪龕隔蕙帷夜寒深雪裏正是挹清時

止息齋

悟得西來意高齋閉止息欲語衆人知流雲去無跡

雲深處

靄靄復冥冥晨昏不斷生欲尋支遁宅須待有鐘聲

一掬軒

蕉葉度窗陰池春綠漲深誰將一掬水大地作甘霖

松花室

翠雲壓真松涼影涵花埒晝靜鳥聲幽風窗墮晴雪

聽聞室

誰讀貝多文疎簾捲夕曛來聽無礙理江上冷秋雲

接待教寺在婁門外寺有八景永樂初姚廣孝留題

宣德中燬重修

遊金碧山記

皇甫信

吳多佳山水莫不可遊觀予生於其間未能盡識未嘗
不以為恨歲丙戌三月十日與友人陸君儀吉賀君澤
民王君濟之輩遊於西山諸君各乘小肩輿入天平予
與澤民濟之漫步僅一里有寺曰普賢寺之後有山曰
金碧崇巖危岑聳挿雲霧飛泉瀑布清映珠壁迴峰盤
紆花木秀麗意者非人間世耶其有神仙輩寓其間也
於是入深林渡曲澗窮高而止濯纓溪流箕踞遐睎則

與吳之山川厯厯如在足膝而輕雲微靄綴青襲翠眇
接遠近四望如一而不覺恍然遺去塵氛飄飄然意吾
三人者非所謂仙者耶已而日色莽蒼林蔭交密歸鳥
飛止鳴聲無人於是喜而飲飲而醉醉而卧卧而忘其
歸也既去儀吉與諸君始自天平還酒罄有絕力既疲
矣謂澤民曰舍車而徒亦有得乎澤民笑曰將與不若
步遠不若近矣乎諸君以為恨夫事有偶得而時有適
逢例而廣之人生行止動靜固不異是歟遂書之以為

記

普賢教寺在太平山之東牛頭峰隴內宋景定間僧
智贊建顏汝勲記國朝永樂十三年僧可立曇萼重
建

陽山大石雲泉菴記

吳寬

吳城西山連延不絕曰陽山山稍北雄偉特甚其陰石
巉然起如人負奇骨而偃者當嶽崱磔硤間有僧居焉
名曰雲泉菴成化間予與太僕少卿李貞伯吳興張子

靜松陵史明古往遊自許市北轉入小溪舍舟從平田
行仰見石勢欲墮舉足甚恐入門竹樹幽茂薜荔滿牆
僧緣崖架木有小屋在石下益奇客喜而就宿聯為長
句明日太僕大書屋壁復題名石上而去後二十年予
再還吳中則太僕以下相繼而逝自嘆不能獨遊而徒
得沈啟南所作鉅圖時取而玩之耳一日有僧來謁問
其名曰智韜則菴之主人也曰山居辱公題詠後遊者
接踵而至大石菴之名暴著於世此皆詩人和篇也予

既為書其末智韜復請曰菴未有為記者更乞為書之
蓋山之有菴相傳為宋珍護禪師所創其扁則銀青光
祿大夫齊國公德剛所題然莫能攷其為何人也石之
大且奇者割列不一當時與客議此可亭此可堂且軒
者尚多今歲久其地如夢中事不能了了況余且老未
知他日歸休再能遊否所幸主僧有開拓志來遊者或
能成之當再為書之刻厓石上通議大夫吏部左侍郎
前詹事府少詹事兼翰林院學士專知制誥長洲吳寬

謨

吳興張君淵松陵史君鑑長洲李君姓穎川陳

君瑄同觀陽山大石聯句

吳寬

巖巖者大石

姓

奇觀人所誦遐想十載餘

寬

來遊五人

共捨舟始登陸

淵

杖策不持輶是時日當夕

鑑

茲山氣

逾涌入門信突兀

姓

拾級駭空洞落星何破碎

寬

靈鷲

宜伯仲仰觀神欲飛

淵

俯瞰心屢恐鱗皴苔蘚剝骨立

冰雪凍

鑑

神驅道撓訶

姓

鬼劈紋錯綜尊嚴凜君臨

寬

張拱儼賓送環列盡兒孫淵擁護等僕從欲假愚公移

鑑諒匪雍伯種卧鼓慨桴亡性對白怯杵重猊吻呀未

收寬龍鬣怒難控凝血宜痛鞭淵立肺詎冤訟上漏還

啟窗鑑中通自成術大惟補天功小可砭肌用分矢肅

慎來性浮磬泗濱貢淵廉利並攢劍兀臬側倚甕嶧山

辱羸秦寬艮嶽遺汴宋節彼民具瞻淵壯哉客難奉鑑

落照紅抹赭歸雲白流汞僧講點頭鷹性將射沒羽中

塵緣契三生寬陣圖懷七縱淵在懸太師擊攻玉詩人

諷仙煮充腹飢

鑑

俗搢免腰痛瑤琨產惟揚

寬琅玕出

乃雍高題少室名

姓

怪作東坡供半空見玉螭千仞附

青鳳

淵

棲禪餘百年問僧僅三衆憑虛迴曲闌

寬

架壑

出飛棟竹幽補堂坳

鑑

樹古嵌崕縫竇黑炊烟熏

姓

坎

平鐘乳擁盤盤棧道危

寬

漈漈水泉動

淵

登頓足力疲

眺望眼界空

鑑

松雪髮欲濡潭月手可弄

寬

窮攀任生

輓

姓

醉吟微帶艷列坐對彎跼

淵

大呼應鏗磬嗜癖牛

李愚

鑑

詩戰鄒魯閔拜竒得顛名憂墜成噩夢試與叩

山靈儻售捐薄俸

姓

與唐子畏遊陽山大石聯句

王鏊

峻極惟崧高嘗聞吉甫誦

寅

石今者何為勢若與之共

偶來試春衣暫爾解塵鞵

鏊

登原路屢迴入門樹爭涵

寅

疊處譬為山呀然忽成洞

鏊

橫陳類涅槃分峙儼翁

仲

寅

啾啾猿度悲跼跼鳥飛恐

鏊

躍冶祥金流摧鋒聖

鐵凍

寅

化工孰燃爐氣機潛理綜

鏊

一整還一歌誰迎

復誰送

寅

陽山劃中開虎阜凜旁從

鏊

靈壁豈同儕岐

陽真異種

寅

仰窺天闕低側壓坤維重

鰲

蹲狔怒將齧

奔馬猛難控

寅

有並若肩隨或分如鬪訟

鰲

龍象整法

筵黈毼失家術

寅

鑿須神禹功煉待媧皇用巖巖揖孟

軻侃侃立子貢洲邊樓碎槌江上城臥甕

鰲

憑焉或言

晉碑爾倏隕宋

寅

五丁安能驅百神互相奉

鰲

負戴賴

鯢鯨點化謝鉛汞

寅

支傾力已疲任大材堪中

鰲

攫拏

鬼亦驚秀傑天所縱

寅

好事來重尋佳句時一諷

鰲

寧

能辭脚繭且得愈頭痛

寅

秦禪偶遺吳漢封當始雍

鰲

扛非九鼎雄富比八珍供鏊咄叱起老羝搏拊來儀鳳寅太湖

隱見微遠山朝揖衆鏊沉船露危檣敗屋橫折棟寅苔古

積成衣藤枯倒穿縫鏊鼃鼃下倒懸嵌空旁或擁寅凌兢

步難移瑟縮心屢動鏊幔亭危冠顛梵宇巧補空寅舉酒

欲浩歌援琴時一弄鏊雲生殿

閣浮風發鐘磬碣寅上帝闕九重下界市一閭鏊目中

無全吳胸次有雲夢寅便當結幽廬採擷當月俸鏊

次鮑庵陽山大石聯句韻 楊循吉

巍乎此陽山有石怪可誦形將水怪截勢與蓮花共仰
觀一何高輕陟不可鞚鳥飛必迴翔雲出自騰涌孤圓
外成嶠空朗中含洞瘦如辟穀良清若食蚓仲深思殆
天設乍至令人恐濃蘿誰作陰寒泉滴為凍戴菴亦顛
危携觴更反綜耳脇忽駢攢勒拳時獨送巍巍上少林
森森下多從荒岬始誰開倒樹諒非種在茲三吳間當
以九鼎重崇巖借冠冕卑巒聽提控勞呼猿固匿被壓
松堪訟曲躬始得門側身還入街拂苔芳容眠收乳兼

資用志猶記秦餘材曷遺禹貢立久氣溼袍嘯高聲答
甕論年越殷周言時晦唐宋一為佛者居永作遊人奉
病宜謚著史寐稱搏養永四方傳不誣諸公評切中臨
谷足還酸乘嶺目偏縱支頤詎厭看極口難竭諷鬼鑿
手須胼鯨負背應痛東岱徒小魯西華謬推雍懸磬風
發鳴香爐烟結供曝沙伏靈黿食岡停遠鳳是知隆拔
羣所貴秀合衆偷餘殿容穰就隙亭閣棟枯藤蔓穿竅
長蛇舌撩縫輕清受指彈玲瓏脫泥擁芾拜本無忝羽

撼乍得動栽培稀尺間構架靡寸空炎伏涼自生清秋
月堪弄林深必賴燭嵐醕能作艷星化猶立芒龍吟殊
叶碕嶺獅馴已賓阜虎寧敢闕久嗟隔勝賞頻勞落清
夢即欲營終棲其奈懷微俸

觀陽山大石

沈周

望望秦餘杭首尾行不了大石突其尻翹然一拳擣山
體厚藏骨吐秀此特表正類抱中嬰頭頂露於襟形大
氣則散趣足喜在小其深雖未即接目遠已好頃來莫

能窮繼至敢艸艸循牆道林麓記曲乃遺香登登覺向
峻漸漸駕木杪猊峰據門左呵禁口欲齧有磴沿百級
有殿嵌山造正殿跨偃石懸身龍蜃矯行人目其下恍
惚布四爪轉高躋其背股栗身亦掉鎮腦結佛亭所仗
力可擾四壁滿題句貴賤成襍掃同遊懲涉險旋踵促
及早次尋石間寮蜂房互窈窕緣勢盡西向局地窄接
撩雲棧中貫穿所歷平地少山靜日自長石瘠人亦槁
坐僻覲居安傳奇被遊攪陽崕詫唇掀陰竇疑目窅虛

含風泠泠濕映雲稍稍衆皴不可熨亂壘龜拆兆層疊
百寶合正紺或側縹亘此金剛座千古不可勦危極壓
屋脊雷雨常怯倒草木亦作怪牢絡萬蘿蔦蒼松長深
縫本矮枝節老斜見山桃花微紅映叢篠草異傳多藥
米掇未諳曉欲宿償三過衾裯悔忘抱既夕氣更佳延
月象倍皎尚欠一踏雪意先有瑤島情狀要細述言語
未獲巧東坡昔袖去援例我非狡山僧苦著相便覺生
煩惱

同前

徐源

茲山有奇觀巍峩設形勝神禹刊木避女媧補天剩磷
磷柱國臣鈞力倏與競日華生錦繡烟雲罩苔徑盤桓
上中峰仰睇復危磴絕頂諒捫天筋力顧不勁岱宗不
可磨此石宜自慶

同前

徐縉

陽山宿稱奇大石更靈怪崕峭忽中空巖連復縈帶烟
霞歛夕霏荔薜留霧靄未經神禹鑿冀受米生拜曰予

抱幽僻薄遊竟誰礙攀蘿躡巉岼采芳越森蒼道以沉
毅超賞與孤高會想念山中人秋空發虛籟虛籟能娛
人客心殊未艾何當謝塵紛乘雲弄烟澂

同前

方鳳

殷勤挾小艇迤邐登大石怪險若神造幽闌真鬼宅凌
漢龍頭昂負重龜背磔倒拽萬牛喘列坐千人窄眇視
笑一拳端拜俯半額憑肩護脰酸呼酒鎮心忒古壁剥
舊題灰竇礙頽屐甫快雨忽晴剛醉日欲夕老禪嗜丈

詞短卷盈咫尺揮毫神欲飛雲開萬峰碧

同前

薛章憲

隕星自天著山巔與天作石知何年
鎔研鼎鑪斷復裂欲墮不墮相鈎連
硃然蹄股躍且跼霜餐雪虐成堅頑
夸娥負山跂一足罔象拔河聳兩肩
嵌空室罅罅鬼手剜蜂房聯絡僧廬懸
峻嶒石磴蛇倒退決往未省愁攀援
還從青衣駕赤犢更覓小有窮兜玄

同前

朱節



金人八卷之三
卷三十三
山深閔竒跡步散漫探索春盡強登臨與衆信云樂
玄豈渺茫去去還咨度伊誰鳴玉琴飛瀑出幽壑捫蘿
苦多岐躡磴恃輕屨繞耳響松筠瞥眼惜花萼眺遠挹
湖光興逸超魚躍倚馬擅三長得鳥在一博穿雲衣自
濡嚼茗泉堪酌薄暝忘言旋餘情戀酬酢明月脫沙中
清風下飛閣此會良不虛重来訂初約

與諸寮登大石

胡纘宗

昔聞大石大於園今見大石大於山峻嶒絕頂壘初出

縹緲中泓橋欲懸波湧洞庭高入座帆圍潯野近當筵
氍毹衣兩兩隨玄鶴天路紆回望若仙

欲別子循登大石雲泉菴

皇甫湜

惜別向何處山龕到竹林以予獨往意憐爾倦游心石
壁飛殘葉蘿軒下夕陰清溪一回首惆悵白雲深

大石雲泉菴在陽山之北麓

上方寺置田疇記

僧淮海

具區為東南之勝湖以頃者三萬六千山以名者七十

有二天光上下烟雲有無風帆出沒渺乎蓬嶠之可到
者也夫差留連于銷夏毛公栖遲于林屋蓋洞庭佳絕
處也艸木葱蒨居民淳古業以漁釣藝植五峰尤為萃
秀文岡蔓麓佛仙多依而廬孤園寺在其下梁將軍吳
猛所施盛時衆至無所容僧有厭憤闢者陟上方構別業
數椽高明澄遠宜禪誦唐會昌六年也厥後歲增月建
成院乾淳間有無證修善師出自閩徧參訪方遷基考
室矻矻垂三十年所當有者必具嘉泰開禧無證再主

萬壽衲子歸心信風傾向曇秀上人復佩師道力於彈
指間聳大樓閣於門皮奉血書華嚴經乃師舊所業也
上方之名始著師曰美哉吾菟裘也微恒產曷能久安
傾囊尚得千緡屬其徒可任者曰元素糾壇立局置晦
僅二百八租斛倍之香積院饒雲行水至平等無礙永
香火於深雲傳鐘鼓於下界巍然宰堵無證固已頂雪
垂垂素亦老矣念厥艱難庸詔來者請記余曰道非人
不弘人非倉不支行乞吾法也當時已有過午餒况農

末兼并嫉吾病民者夥矣於戲井賦既開病民非一端也今上方營二頃田存千指之衆安居而暇食五觀之餘罔或逸豫盍思所以淑民者而去其所以病民者則素之心可塞也若田鄉都比界備載于券予書其序如此西山之遊栩栩飛動尋香山之留詠訪角里之遺跡穿幽透深窮高極遠他日尚能賦之

上方寺

范成大

艤棹古銷夏搢筇新上方珠灣鎖圓折冰鏡沉空光楓

纈醉晴日橘黃明早霜閉門松竹徑隨處有清涼

同前

張雨

橘林千黃金林盡路逾僻忽臨銷夏灣雲海浩如積綺
季不可追空餘騏驥跡

同前

王寵

山水雲門會林篁石徑微毫光空翠落花雨瀑泉飛麋
鹿參金鏡莓苔積寶衣浮沉竟何益轉覺此生非

上方教寺在洞庭西山唐會昌六年僧道徹開山本

名孤園寺宋嘉泰間萬壽寺僧無證重建始著今額
復置田疇僧淮海記

祇園寺記

李居仁

釋氏稱給孤園祇陀太子之園也以黃金布地得八十
畝施為寺南朝散騎常侍施所居為寺名孤園其心必
有契於祇陀之心而以名寺耶不然則他人以其事符
於施給孤園之事而以寺名耶抑猛之名多載儒典予
嘗求猛之行夏月不驅蚊恐去已嚙親夫愛親好善也

崇釋好善也若猛信善人矣施所居為寺宜乎有其事也復聞猛好道術回豫章江急莫可濟畫水成陸路而行夫猛好道學長生也好釋求不死也若猛者釋道兼好者焉施所居為寺宜乎有其事也寺在陳隋間規模壯麗棲僧半千唐初有徹道師者脫俗其間宗風大振實居猛之居既而以人夥務繁無以成學乃作別室於北山麓今上方院也廣明間巢寇作寺弛僧絕惟上方克存無恙宋咸淳年僧有名能名門名輝者欲興其廢

其力為之遂募緣於鄉之巨室銖積寸累成五十餘楹
亦以猛之址也工畢請記于余余嘗閱郡乘知寺肇於
猛故不辭而書之

祇園寺

蔡羽

空白靜雲水古木亦蕭森鐘鼎丹砂厚碑文綠字深溪
光動靈籟野曠颯秋陰放棹過湖去青天疊翠岑

祇園寺在五峰嶺下本名孤園寺一名下方寺

華山寺記

僧懷深

洞庭華山觀音院者本在胥湖之北宋元嘉中會稽內
史張裕請於朝而立焉初裕嘗事應真謹甚感池產千
葉蓮因名院曰華山隋大業間廢唐開成四年遷於此
往時浚治得會昌斷石碑其畧云羅浮常安禪師卜其
地即里人徐正甫所施也咸通十五載奏賜今名再廢
於會昌至是復興有屋十楹視洞庭西峰諸刹最為勝
絕處主僧維照篤志學佛材氣足以立事嘗語其徒曰
茲院號觀音蓋未覩其像名存實亡於是用紫旃檀八

百兩造像飾以黃金工妙天下并刻諸天十六為大殿
以居之規模雄偉動人心目費錢三百萬毫累銖積閱
二十年厥功乃就弟子維監實左右之既而照公欲刻
諸石自太湖泛舟登靈巖謁慈受叟懷深求記其事懷
深曰華嚴經云海上有山多聖賢衆寶所成極清淨是
大寶殿起於層波中鬼工神運豈異此耶請試宴坐反
聽默觀則風濤澎湃水石相薄林木鳥獸粥魚齋鼓由
此也喜照公能以成就故樂為之書像造於崇寧五年

二月工休於四月殿作於靖康二年之二月落成於建炎改元之七月記以是冬之十月初八日也

華山寺即觀音院在龍頭山之西宋元嘉二年會稽內史張裕池生千葉蓮奏建本在胥湖之旁唐開成四年通玄寺僧契元移置於此宋僧懷深有圓通殿記

福源寺田記

王公振

田疇利天下尚矣神農作耒耜后稷教稼穡一或去食

人類絕矣釋氏雖以虛無為教非田疇則何以哉福源肇於梁之大同廢於隋之大業復於唐之貞觀大於國朝之紹興殿宇巍然古迹僅存東西廊廡映帶皆比年草創之規模也寺之初未有阡陌慶元改元比丘志寧矢心發願營浮屠宮抵儀真會里人勞公檀越相與言曰學道無有自虛空入者常住二時益謀餽粥之計乃慷慨興念與錢三十萬歸今之常住慧通戮力營置田二十一畝有奇慧明又募衆積勤累年合為八十餘畝歲

有常產以充淨供始免謀食之憂有金穰之應無水旱
之災彼給孤施園知末而不知本妙意設食可慙而不
可常視此孰勝恒沙有竭此食無竭勞氏之德溥矣予
遊西山十二年知寺僧亦不妄食人之施者於是乎書
嘉慶十二年二月望日三山黃公振撰

福源寺在毛公壇之南攢雲嶺梁大同二年吳縣令
黃禎捨山園置僧普國開山隋廢唐貞觀中興

華山寺

范成大

五湖西岸孤絕處梅檀大士來同住性空真水遍清涼
隨緣出現無方所蒙泉新潔鑑泉明淪茗羹藜甘似乳
何須苦問蓮開未桂子菖花了今古三翁彩筆照青霞
從此他山都不數我今閒行作閒客暫借雲窗解包具
魂清骨冷不成眠徹曉跣趺聽粥鼓脚力有餘西鵲盡
明日灣頭更鳴榔却上東山喚德雲別峰應在銀濤許
寺在西山盡處多泉泓僧房中數處有之有湯岐公

胡茂老孫仲益題詩

同孟文質弟元大游華山寺

陸川

嶺畔華山仄徑通新年游興有人同
桂垂玉筍消殘雪壑湧松濤瀉晚風
烏背日斜屏嶂綠巖腰泉落鏡潭空
雲深更是幽棲處修竹奇杉翠不窮

西小湖寺記

曾榮

姑蘇太湖有山焉磅礴峭拔屹然特立湖中山頂有小湖泓渟澄澈炯若寶鏡每太湖風生浪湧則小湖必相應梁大同間達法師始以其地創為寺唐乾符中有沉

香觀音像汎湖而來諸山具舟爭迎莫能動獨西小湖
寺僧誠禱像忽隨波低昂一舉而上遂至寺像旁楊枝
水下滴皆生千葉蓮花由是四方水旱疾疫禱莫不驗
寺遂大興宋元之際弛于火棟宇無遺泰定中昌法師
始創觀音殿國朝平張氏中山武寧王駐兵於此號令
嚴肅寺得不廢永樂初僧惟寅主寺事十餘年出其先
師康伯寧遺貲興造聞者爭以施始建三聖殿暨廊
廡方丈衆室像設靡不備高甍鉅棟金碧煥發湖波嶺

岫光彩浮動於是西湖一寺之勝悉復其舊西湖為東南名刹唐白居易宋孫覲咸嘗題詠茲來京請記其事遂為之書

西小湖寺

白居易

湖上山頭別有湖
芰荷香氣占仙都
夜涵星斗分乾象
曉映雲霓作畫圖
風動白蘋天上浪
鳥栖寒沼日中烏
若非物外多靈跡
爭得長年水不枯

西小湖天台教寺在縹緲北二里乃觀音教院也嶺

有一小湖名海眼每太湖波濤起此中波浪亦涌蓋
水脉相通云相傳唐時有沉香觀音像浮波而來諸
寺院迎之不可得西小湖晚來迎得之像上有水滴
路皆生旱蓮至寺有草少許繞像棄之池中即開重
臺蓮花後人殺犬污其池花不復發國朝永樂十四
年僧惟寅重建

包山寺

范成大

仙隄遜半坐精廬遷古幢
稿衲昔開山至今坐道場
熾

然說慈忍禪海薰戒香稗竹暗寒碧飛松盤老蒼船鼓
入宴坐紅塵隔滄浪藤杖懶歸去共倚蒲團牀

同前

徐震休

屋下清泉屋上山薜蘿深處扣禪關尋僧欲問三生話
使我能偷半日間雁沒浦雲秋色外鶴歸庭樹夕陽間
人生為惜懽遊少石壁題詩記往年

過包山寺贈旭東明

杜瓊

東明八十守枯禪不出包山已數年聞道我來門口坐

兩人扶掖下山顛

包山寺

王寵

百嶺自迴合天開寶樹林雲藏靈影曳風竹澗泉吟白石參龍象青山習道心網羅空繾綣吾意在高深

宿法華寺

王鏊

法華我曾來懸厓縱飛步長松高參天修竹亂無數北岡瞰空濶風帆在其下橫陰紹千山厯厯皆可睹蓬萊亦咫尺神仙在何處安得乘長風飄然從此渡

坐法華後石上望遠寄王元德

午烟孤起碧山厓
瓦室參差日影斜
只隔盈盈衣帶水
不知何處是君家

法華寺在金鐸山之嶺

與陸無蹇宿資慶寺

蔡羽

空壁聞啼鳥
雲深冷石房
春隨落花去
人自采茶忙
葉暗翻經室
泉虛點易牀
陸郎谿壑主
假榻久何妨

資慶寺在涵村之陽

訪翠峰寺和樂天韻

李彌大

山浮羣玉碧空沉，萬頃光涵幾許深。
梵剎樓臺噓氣蜃，洞天日月浴丹金。
秋林結綠流連賞，春鴈藏紅次第吟。
擬泛一舟追范蠡，從來世味不關心。

題翠峰寺

范成大

來從第九天，橘社繁歸船。
借問翠峰路，誰參雪竇禪。
應真庭下木，說法井中泉。
公案新翻出，諸方一任傳。

寄翠峰寺敏仲謙

釋子賢

敏公遙住洞庭西咫尺烟波路欲迷落日斷霞山疊疊
揚舲鼓枻風淒淒魚龍出沒隨潮上橘柚參差壓樹低
東崦人家更清絕也思來此作幽栖

入翠峰寺

吳寬

步轉危峰路豁然梅花叢裏見青天春泥不浣登山屐
又過長松啜冷泉

題翠峰寺

吳鳴翰

野服乘春到梵宮上方佳境似崆峒藤蘿翠掃千峰雪

蒼蘊香傳一殿風間聽磬聲知定起靜依潭影覺情空
清時未許投簪紱此意還應問遠公

遊翠峰寺

雪竇道場

徐禎卿

香燈閒照古堂虛日午桐陰上井遲嘗橘客求藏甕法
煮茶僧乞啜泉詩聽經猶剩當年鹿好事誰摹宿草碑
陳迹半銷何處問令人空憶翠峰師

謝吳東澗惠悟道泉

吳寬

試茶曾憶廿年前抱甕傾來味宛然踏雪故穿東澗屐

迎風遙附太湖船題詩寥落懷諸友悟道分明見老禪
自媿無能為水記遍將名品與人傳

和

沈周

彭亨一罷置堂前思此泠泠久缺然借取白雲朝幙甕
載兼明月夜同船小分東澗聊知味大吸西江亦喻禪
紗帽籠頭烟繞鬢煎茶有法是盧傳

酌悟道泉

王寵

名泉真乳穴滴滴滲雲膚白石支丹鼎青山調水符靈

仙食玉法人世獨醒徒長嘯千林竹清風來五湖

翠峰禪寺在莫登峰之陰唐將軍席溫捨宅置蘇
州志云宋初明覺顯禪師住茲山說法時有龍出井
羅漢亦隱樹而聽寺有悟道泉

興福寺記

吳寬

吳地多水其最鉅者曰太湖太湖中多山其最鉅者曰
洞庭洞庭為山周可百五十里中有穴相傳禹藏治水
符於此因名其東十里又一山相距而差小其勝略等人

稱東洞庭以別之當波濤浩渺間兩山對峙鬱然蒼翠
儼如畫圖殆道家所謂蓬萊方丈者民環山而居善植
果木世擅其利而屋宇間巷聯絡映帶忽不知其為山
林也其尤勝處往往有佛寺據之成化十五年二月既
望予與兵部李公為東洞庭之游自岱心吳氏肩輿
行十里許入俞鵬得寺曰興福主僧恩復出迓客延登
其後小閣是時梅花方盛開彌望如白雲崕谷莫辨山
有九鵬九鵬之水合流循寺門而行松根石罅水聲瀟

澹意甚樂之予既留詩而去未幾北來京師車馬塵埃間未嘗不思東洞庭之游之樂也一日有僧叩門來謁予熟其貌則昔者復公之徒也其言曰興福寺久矣甚恨無文字刻石可考往者幸辱遊覽惟終畀之此智勤所以來者予嘗愛其寺據山水深遠處殊為幽僻宜學佛者居其徒歲食田園所入可以自足而予所接如復如勤輩又皆恭謹能守戒律稱學佛者予何愛一言不為之記耶寺建于梁天監二年傳有于將軍者所捨宅

故在山之麓始居者曰清禪師至唐遷於此歲久興廢
皆莫能知可知者廢於國初而深谷邃公復興之二傳
仍廢而僧亦絕矣景泰間今復公始自其山法海寺從
里人之請而來凡建門堂殿閣數十楹而佛像咸具蓋
智勤實相其事而成之是為記

興福寺山居記

王鏊

浮屠氏之道有合乎吾儒之所謂靜何也達摩西來傳
佛語心心或撓焉則安得而寂或淆焉則安得而清或

翳焉則安得而明是故亦有資乎靜也靜斯定矣慧矣
然後惟其所之靜亦動也動亦靜也洞庭有湖山之勝
而恒患於偪狹所謂俞鳴者窈然而深坦然而夷長松
參天奇花異果紛峙羅列而興福寺又據其勝占其幽
勤上人又擇其巉絕之處作山居焉旦暮焚修終年蔬
食年且九十而貌如少壯者非有得於靜耶若吾人之
所治者由靜而安而慮而得其素講也顧擾擾焉日馳
乎外非名則利有若勤之靜且專乎是不能無媿於彼

也然吾有問焉若勤之靜惺惺然專一之中其有所主乎其無所主乎有所主則倚無所主則蕩則所謂靜而定者其亦難乎故因其居之成為記諸壁而因以問之

興福寺小憩

吳寬

九鵑寒泉一澗流遙從木末望山頭春風未掃禪林雪更為梅花半日留

興福寺在俞鵑之南梁天監二年于將軍捨宅建清禪師開山國朝成化中僧智勤重修

靈源寺

葉顥

散花大室靜焚香小小雲龕穩勝牀
須信定中還有定
莫言方外更無方
青蓮滿眼非真色
白月流金只慧光
今日相逢陪軟語
塵緣俗慮一時忘

同前

碧螺峰下靈源寺
草木無多屋半荒
一自先生來卜築
山雲山霧盡文章

宿靈源寺

徐禎卿

江城歲晚欲回舟山寺攜衾作夜遊愛月不妨寒步影
岼冠微覺露濡頭蒲團對語僧圍燭菊宴分題客咏秋
怪是思清還廢寢鐘聲為破小堂幽

靈源寺在碧螺峰下

遊能仁彌勒二寺

古殿秋荒落晚曛叩門先怕鹿驚羣靈池石亂金龍隱
梵磬聲清石洞聞遊客到稀塵裏鉢高僧化後鶴哀雲
飯石禪師
舊居于此幽懷未吐煩君問何日禪牀許見分

能仁寺在長圻嶺之東彌勒寺在飯石峰下

宿華嚴寺

王鏊

歸來每向招提宿心若閒雲著處安已到家山無去住
偶聞塵世有悲歡烟霞自可通禪觀草木還應識宰官
少小來遊今白髮幾回欲去更盤桓

華嚴寺在翠峰之陽

飯法海寺

吳寬

行盡松杉嶺漸平日高深谷喜新晴山樓飯罷渾無事

獨倚危闌聽水聲

法海寺在莫釐峯之陽

三峰寺莊田記

曹熙

三峰古刹也四面皆平湖遙岑屏列空際山屹乎其中
孤絕而巧世人名為小蓬萊以其與人境隔也鐘鼓三
百年風月三萬六千頃勝槩甲於吳中清高之士往往
萃焉由是二時之供常苦不繼朝營暮求出者勞力居
者勞心不知清淨之為樂移念慮于米鹽細故者多矣

上人惠因者欣然有衛道計乃罄囊中物轉鬻長生田
為善士倡此邦之人爭割已以助成之得田百畝者視
歲乏之數而僅充焉使同堂大德開單轉鉢不必乞諸
長舍城中而能具足圓滿豈不美歟夫田百畝有限福
利無邊歲月有期齋供無盡食輪既轉道心益堅推原
所自烏能無紀耶噫事莫難於有始而上人倡之事尤
難於有終而善信繼之是田也無時而已是福也亦無
時而已西方之聖人教行於中國果且如是而已乎果

且不如是已乎

三峯寺在三山唐咸通十三年僧真銓開山

徐氏襲慶菴重修記

徐有貞

禮不墓祭墓而為之享祠禮乎曰禮無之也其義則有
取焉先王之世卿大夫士之祭有廟士庶人之祭有寢
固無事乎墓祭也漢立原廟後世因之而卿大夫士庶
始有為祠以享于墓者其於禮則遠矣然原其為心則
固有孝子順孫追遠報本之意焉君子於此其可深非

之耶光福徐氏吳之望族也家於鄧尉之陽而墓於其山之陰以昭穆而數之者餘十世焉國初李清之曾大父建寧司訓良輔始建享祠于墓左春秋合族而祭即今之襲慶菴是也菴之建距今蓋七十餘年而日就隳圯李清顧之歎曰先祖之祠子孫坐視其廢吾罪多矣遂請於族汝航而新之其祭享之儀一循良輔之規焉李清乃具始末謁予請記以示子孫嗚呼李清其賢矣哉世之不肖子孫藉先世之業而莫之能振觀祖父墳

墓有如路傍之廢塚荆榛不剪狐兔不驅薪其樹而貨其田曾無感感於中亦獨何心哉觀於季清之拳拳以奉祠為意而惟恐弗逮其順悖豈不遠乎君子於是乎有以賢夫季清也雖然予猶有所告於季清古之所謂孝子順孫者以其克繼承乎父祖之志也迺曾祖之為是菴而以襲慶名之固將以貽慶於爾子孫而冀之世繼其志焉耳易曰積善之家必之餘慶是慶之致必以積善也善不積慶何由而致季清於是孜孜焉以善繼

之乃子乃孫又孜孜焉以善繼之則天之福善必世祐之徐氏之慶其可量乎是為記

襲慶菴在鄧尉山北

題善惠菴八詠

劉溥

潛心堂

松堂坐來久脈脈夜方永明月上寒城不照塔輪影

覽勝橋

修梁擬虎谿野色分南北遊人來復去羣峯聳寒碧

綠雲軒

幕幕晝陰合重重涼影浮清風吹不散洒然孤磬秋

翠濤林

潮音出東海風洒松梢夕聽耳久無聞喧來詎忘寂

白蓮沼

水花涵玉香苦心愜幽素入社方有戒不著窺魚鷺

紫蘭室

一室大如斗中有萬古春罍罍終為累畢竟許誰紉

梅牕月

南枝本無影皓魄閒自照橫斜上踈楞相對成一笑

桂苑風

西林釀天香鼻端來陣陣僧厨飯初熟適此吹花信

善惠菴在長洲縣九都元大德間僧明本開山郊天
如記有施茶亭

天池寂鑑禪院記

釋克新

距姑蘇城西一舍皆山五峰環峙者曰華山峰之趾有

泉泓然曰天池大旱不涸池北為寂鑑禪院沙門在公
環庵所創者以至正丁酉避兵來愛其地而賢首師別
聞聰公施財因巖為屋以居道侶正堂無竭募衆資之
於是作石殿三間就石肖釋迦藥師彌陀像其菩薩侍
衛之神與供養之具皆石為之又琢石為五十三參於
三門左右壁累石作外門門上為重屋夜寘膏火其中
曰天燈樓磨崖刻三十五佛名鑿池左右立石為彌勒
彌陀而屋焉署曰兜率宮極樂國前樹梵塔對峙巍然

他及禪誦之室庖湍之所賓客之館咸具如式既成而在以基地為大覺寺業為未備今年大覺以致閏號山五十畝售在在偕其徒菩澤傾索買之乃來請書其事于石昭示來者按山舊誌劉宋時為會稽太守張裕私第裕事佛甚謹因供羅漢而池有千葉青蓮花之異復有鏡法師於此著書曰法華玄義行世趙宋乾道間為張秘監別墅有亭館曰浮槎望湖滌煩釣灘者十餘所造圓通像於蒼玉洞又肖己像侍焉由是山名益著以

降而寂寥者二百年今環庵於兵戈擾攘之際荆榛莽
蒼之中不數年化成蘭若非夙乘願力疇克如是耶所
謂前身後身未可知也開基日方舉一石則泉隨石而
湧瀦之可給二百人其有以夫環庵名道在京口人得
度於普應國師中峯本公師事既久遂升堂奧所至士
民向化嘗築菴武庚之上柏丹陽之環谿二邑之人迨
今思之行年七十有七精力強健可喜故樂為書之今
年洪武二年己酉也其智文辨大禪師蘇州府承天能

仁禪寺住持克新撰前資善大夫江浙等處行中書省
左丞周伯琦書并篆住持沙門端文菴主正敏副菴道
隱西序契端性實同立石

華山天池院記

趙同魯

天池在華山之麓距郡城西二舍許巖石奇秀望之如
屏池生千葉蓮昔人服之羽化老子枕中記云此地可
避難有十一景之目誠三吳靈秀之區也院創於劉宋
時會稽太守張裕舍宅為之復有鏡法師者著書於此

宋乾道間為張秘監別墅既而廢弛踰三百禩至正間有環菴在師中峯本公高弟也始來居之卽菴曰寂鑑建石殿肖石像壘石為門剏石摹五十三參相磨厓勒三十五佛名天燈有樓兜率有宮侔大叢林無所不備自後鐘魚不鳴法龍不吼迨將百年弘治初寺僧清古潭誓欲修之而力不逮聞天目山有異僧普惠師寓蘇之寒山寺將往迎之未果而古潭示寂其徒淵天泉慨然曰吾師之願不可不竟也謀諸鄉耆德蔣廷用輩偕

往禮請師乃幡然赴之法幢一建四衆雲集貧者効力巧者獻伎富貴者投金帛善人龐彥誠首施白金二鎰衢工江友文力斲石壁三百餘丈遂于今年三月八日起建大雄殿莊嚴三世諸佛旁列阿羅漢像講法有堂棲禪有所增飾兩廡庖庫圓溜以次修舉落成之日天泉以為惠師之願力檀施之良心興建之歲月不可無記乃礱密石手疏顛末介予友翁君景和謁文為記余少時嘗觀黃子久所繪天池石壁圖及高太史諸公之

什恨不一覽其勝迨今未遑間嘗夢入一山瞻石室像而浴清冷之淵尋得其疏并菴記讀之其與夢境若合符節吁奇矣哉惠師出大願力作如幻事化草莽為金碧山川為之改觀雲烟為之動色予以夢寐之頃獲接真境若身履之以償素願非其教所謂一切有為法如夢幻泡影者歟雖然土木成壞有數而有不成不壞者存蓋佛之為言覺也將以覺羣生沙門之言息也將以息諸妄師能演其教啟羣迷為正覺轉惑見為真智其

有功于象教為何如遂書以復於天泉俾勒諸石系之
偈曰

顧譊天池水湛然浸虛空虛空原不壞萬劫為如是其
中青蓮花亭亭出泥滓有如清淨身色相無染著嘗聞
枕中記此地可避難龍蛇縱起陸是中常自在劫火熾
欲然至此即消滅屏去諸煩惱屏去諸惡業是謂兜率
宮是謂極樂國惠師化利功成此希有事檀越爭駭奔
神輸鬼復運棟宇極翬飛莊嚴最壯麗天人阿修羅一

切皆供養凡百供張具種種無不備阿含經有云能補
故寺者是為二梵福故寺且云然是非故寺比功德當
云何無量亦無邊以至不可議弘治五年八月中秋郡
人趙同魯撰文住山道淵立石



吳都文粹續集卷三十三